



Assam nung maritime institute
lapoktsü: Union minister Sonowal

GM Sethuraman-i
Barcelona Open kokogo

VOL. XVIII NO. 315 (ADOK 315) DIMAPUR

KÜPTOKNÜ (SATURDAY)

LUIROI (AUGUST) 28, 2021

₹ 5.00

COVID-19 Nagaland: Anogo 7 atongtepa taneptsü angur teimba

Kohima, August 27, 2021 (TYO): Nagaland nung anogo tenetnü atongtepa COVID-19 puteter dang nungibo taneptsü angur teimba liasü. Hokolbarnü nisung 78 taneptsü angur aser 63 dak putet.

"Tesüiba ghonda 24 tsungda COVID-19 agi shiranger nisung 78 taneptsü angur. Parnokji Kohima nung 33, Dimapur nung 23, Mokochung nung 14, Zunheboto nung 6 aser Peren nung 2 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

Parnok züngsema taneptsü angur ajak agi nisung 27,535 kümogo aser ibaji 92.27% lir, ta pai ashi.

"Hokolbarnü nisung 63 dak COVID-19 aliba putet. Parnokji Dimapur nung 24, Kohima nung 14, Mokochung nung 10, Longleng nung 5, Phek o Zunheboto nung asemsem (3), Kiphire nung 2 aser Mon o Peren nung kaka (1) lir" ta Dr Kikon-i metetdaksü.

Nagaland nung tang nisung

818 anepaludar aser tanü Dimapur nung COVID-19 puteta alir nisung 2 asü. Tena züngsema tasür ajak agi 614 kümogo, ta paisa ashi.

"Tang tashi nung COVID-19 alitsü akok ta temolung melemi bilemba sample 314,028 tendangogo. RT-PCR ajanga 105,983, TrueNat ajanga 74,806 aser Rapid Antigen Test ajanga 133,239 tendang" ta Dr Kikon-isa ashi.

"Brihostibar tashi nung nisung 133,239 nem COVID-19 vaccine indang dose 846,130 agütsüogo" ta State Immunization Officer, Dr Ritu Thurr-i metetdaksü.

Vaccine agirtemji frontline workers 60,848, healthcare workers 15,990, arishi küm 45 ser tempur 192,192 aser arishi küm 18 nungi 44 tsungda alir 384,180 lir, ta paisa ashi.

"Vaccine agirtem rongnung nisung 192,920-i dose anaprong agiogo. Parnokji frontline workers 43,771, healthcare workers 12,877, arishi küm 45 nungi tempur 113,196 aser arishi küm 18 nungi 44 tsungda alir 23,066 lir" ta Dr Thurr-isa ashi.

PHED Nagaland-i anogo 100 Campaign tenzüker

Dimapur, August 27, 2021 (TYO): August 27, 2021 nü PHED Conference hall Kohima nung "Sustainability of ODF gains and achieving million Soak pits" indang anogo 100 Campaign tenzüker.

Tanü Kesonyu Yhome IAS, Secretary, PHED-i ODF plus Components aser 100 days Campaign tenzüker liasü.

Sentong nung Kesonyu

Yhome-i field officers ayongzüka jembidang anogo 100 gram campaign nung panchayat ajak ayimjemtsü ashi.

Sentong nung mendenji Chief Engineer, Sanitation & WSSO PHED Er. Thsathrichem Sangtam liasü aser pai Action Plan indang osang lemsatop aser Chief Engineer & HoD, PHED Er. Repangyangba Longkumer-i anküp tepela o jembi.

Power department ya welfare department ka masü: Advisor Tovihito

Dimapur, August 27, 2021 (TYO): Power department ya welfare department ka masü aser nübortemi electricity atsükba atema bill agütsütsüla kechiyong iba ya tax masü ta Power department Advisor, Tovihito-i ashi.

"Asenoki atsükba atema sen agütsütsüla" ta paisa metetdaksü.

August 27, 2021 nü Additional Secretary Power, Mohammed Ali Shihab-i SLDC complex, Nagarjan Dimapur nung senden ka ayonga amendang Advisor, Tovihito-i iba olen jembi.

Dimapur district nung power auyaa atsükba noktangsü, bill saruba inyakyim tajungba akümtsü aser power system tiptema ayutsü atema iba senden ayonga amen.

"Nagaland nung aser talisa Dimapur nung commercial

maparen kanga inyaker aser power melira, rongsenketzüng maparen ajak anentsüsa akümtsü" ta Tovihito-i ashi.

Power department-i revenue shitak angutsü atema civil society teloktemi yaridaksünür. Department aser civil society teloktem yaritepa power atsükba indang sen agütsütsü tangatetba lidaksütsü atema sentongtem ayonga agütsü, ta paisa metetdaksü.

Advisor Tovihito-isa Department dang district administration aser police dena sendaktepa alirtem den amalitepa inyaka aotsü ashi.

"Dimapur district nung koda masüba mapang dak alaka power shut down malitsüla" ta Principal Secretary Power, K.D. Vizol-ia ashi.

(Maneni tapak 10 nung...)

Watsü Mungdang 22 buba inti senden takok ngua mungogo



Watsü Mungdang 22 buba inti senden nung Mokochung D.C Limawabang Jamir-i "Lenpir" kaket sayatsüdang tangokba noksa nung angur. Mokochung, 27th August, 2021.

Mokokchung, 27 Aug (TYO): Watsü Mungdang 22 buba inti senden Aug 27, 2021 nü yangi Mokochung town hall nung meraketa mungogo. Alima tensa tia mesüngjemba ajanga yaküm küm nungi iba senden mekateti arur taküm ang agiteter. Iba senden sorkari lateta yutsüba Covid19 SOP shitak amshia liasü.

Sentong nung omen "Aotsür Jenmung" onük nung ajemdaker Library cum Theological Research Consultancy, Mokochung tentetla Wt. Dr. I. Asongla Pongen-i jembidang, Aotsür jenmungji akhi tsürabur Jungliyimti mapang nungi tejangja yateta yuja kar, anungji, ibaji Aotsüri wazüka ayutsüla, ta

shilem tulu aliba kuli dena metetdaksü.

Tangari Aotsür jenmung meraketa aser akhümketa reprangtsüsa aser maaksü bener aruba jenmung ka masütsüsa libaliru ajungtsüla, tejak repranga inyaksangshi masütsüla, miim o meperokshitsüla ta lai tayongzüka agütsü. "Tenüngsang agütsüba nung Aotsür anünga lir, anungji, tajung dangbo junger ta shitetsüla", ta laisa inyadaksünüba o ka ashi.

La mangdang ana lemsatepdang, joko tanü alima ya balaka kümogo aser Aotsüra lenmang aisü nung teburtem meneptepa atudar, anungji, Aor rangben ajungtsü asoshi

lemtetba lokti - Ao Senden nung adentsüla aser arogo tsütsü nunga Pastor mapa mesüra executive secretary menden tashi nung mentettsüsa inyaksüla, ta lemsatetpa liasü.

Ao Senden tir, Chubawati Lcr-i tajungshi o jembidang, koba lokti südir süaka tenzükertertemji taküm piyong atema shimba masü, anungji, shirnokisa tenzükdir pei mapang nung tajungtiba inyaksü merangtsüla, ta ashi. Tanü joko Aor jenjang akhi ama masü, anungji, watsülartertem teinyaksü wadang aika lir ta shia chimurtem tajung adokdaksütsü asoshi ajungshia liasü.

(Maneni tapak 10 nung...)

Centre-i sen agüja inyakba mapa nung tenük yoktsüla: RPP

Dimapur, August 27, 2021 (TYO): Rising People's Party (RPP)-i Naga lanurtem dang Centre-i sen agüja mapa balala inyakba osang agütsütsü mepishia metetdaksüogo.

Küm shia Centre sorkari Nagaland nung mapatong balala inyaksü atema sen crore noklang aika agütsür saka mapabo meinyaker, ta RPP-i ashi.

Centre-i sen agüja inyakba mapatem nung tim mesüi inyakba kulitem bendenba sülen state Lokayukta tsungdang RPP-i FIR tem benoktsü, ta parnokisa metetdaksü.

Anungji, tsünglanglen agüja aliba mapatong inyakba tesem nung aliba lanur/kaketshir teloktemi mapa inyakba osang tejangja bushiteper RPP nem sangoktsütsü mepishir ta parnokisa ashi.

L a n u r t e m i risingpeoplesparty@gmail.com nung bushitetba osang agütsütsü akok, ta Rising People's Party-isa metetdaksüogo.

2019-2020 nung Ministry of Tribal Affairs ajanga sen agüka inyakba mapatem:

Sl. no	Name of the project	Cost of the project	Area/place
1.	Establishment of Tribal Hostel	Rs. 1 Crore	Niuland, Dimapur
2.	Food Processing Plant	Rs. 4 Crore	New Minister's Hill, Kohima
3.	Vocational Training Institute	Rs. 1. 20 Crore	Diphupar 'B', Dimapur
4.	Vocational Training Institute	Rs. 80 Lakhs	Old Minister's Hill, Kohima
5.	Indoor Stadium	Rs. 1 Crore	Seyochung, Kiphire
6.	Construction of Playground and rostrum	Rs. 1 Crore	Changkong village, Mon
7.	Community Hall	Rs. 1.50 Crore	Jotsoma village, Kohima
8.	Working Women Hostel	Rs. 1.20 Crore	Mon
9.	Organic Food Processing Plant	Rs. 2 Crore	Tuli, Mokochung
10.	Old Age Home	Rs. 68 Lakhs	Sungratsu, Mokochung
11.	Integrated Farming	Rs. 1 crore	Mongsemyimti, Mkg
12.	Coffee Plantation	Rs. 1 Crore	Botsa block, Kohima
13.	Fishery and Hatchery Unit	Rs. 50 Lakhs	Sovima village, Dimapur
14.	Piggery and Dairy Farming	Rs. 50 lakhs	Chiechama village, Kohima
15.	Multi-Farming	Rs. 50 Lakhs	Vidima village, Dimapur
16.	Multi-Farming	Rs. 50 Lakhs	Akuk Village, Wokha
17.	Cultivation of Indigenous Wild Berries	Rs. 75 lakhs	Sokhuvi, Dimapur
18.	Community Diversity project	Rs. 2. 95 Crore	Longleng district

NDPP 9th Kohima Town ajanga HSLC & HSSLC topper tem tushi



Kohima, Luroi/August 27 (TYO): Kaketshirtem temaba jenjang tongtetsü asoshi meranga inyaksü ajungshia, NDPP 9th Kohima Town A/C aser Advisor, Urban Development and Municipal Affairs, Dr Neikiesalie Kire nungeri Nagaland Board of School Education ajanga agiba High School Leaving Certificate (HSLC) aser Higher Secondary School Leaving Certificate (HSSLC) examinations 2021 nung topper 27 nem tenüngsang aser tetushi agütsüba sentong ka agia liasü.

Dr Kire'er kidang iba sentong agidang tetushi tesemdang ka ama jembiba mapang Advisor, School Education, K T Sukhalu-i, "State sorkar nung mapa inyaker lakh 1.2 lir, koba kanga agi talila lir, anungji sorkari ibaji ajemdaksütsü meranger," ta ashi.

Tarutsü nunga sorkar nung mapa inyaker ajemdaksüba maparen maneni inyaksü aser state nung ano menüngdakba post aika tang tashi lir, koba agientsü, ta paisa ashi.

Government sector nung employment ya kanga ajema akumtsü, ta Sukhalu-i ashi.

Tanü alima ya kanga toktepa lima ka kumogo aser yamaji tarutsü nunga tali ang tokteptsü, anungji temaba jenjang tongtetsü asoshi nükjidong nung rangloker meranga inyaksüla, ta pai ashi.

Paisa tsüraburtem dang pei chirtem lanuwa mapang tetsükdaksü balala ajangettsü asoshi nungita yaritsü ajungshia liasü.

Tekolok ajungba den meranga azüngba ajanga parnok temaba jenjang tongtetba lir, saka dangar den tokteptsü asoshi kaket shisatsü kisüng agi meperitsü, ta pai

ashi.

"Tarutsü Naga nunger lokti asoshi nenok dak nükla tajung lir. Aser yamaji Nagaland tajungba kumdaksütsü asoshi lanurtem dak tangatetba aser yimya tajung lir. Anungji nenok wadang kanga shisa kaa shimtsüola," ta Advisor Sukhalu-i ajungshi.

Dr Kire-i iba ama sentong ayongzüka kaketshir ajungshiba atema pai pelaba lemsatepa liasü.

Special Secretary School Education, Kevileno Angami-i iba sentong nung jembiba mapang, iba ama sentong yagi meranga inyakba nung süngjang atangba ajiteter aser ano maneni meranga inyaksü ajungmesor, ta ashi.

Keketshirtemi takok angutsü asoshi meranga inyakba atema tenüngsang agütsüba mapang maneni kasa yimya nung alitsü, lai ayongzüka liasü.

NFHRCC den onok dena lir: PPC

Dimapur, Luroi/August 27 (TYO): Nagaland Foothills Road Coordination Committee (NFHRCC) ajanga state sorkar nem anogo 30 atakzüka tezüluba nung takhangba ka agütsüba nung Phom People's Council (PPC) dena lir, ta PPC tir Shami Angh aser tezülur H. Sunep Phom nati sangdong ka ajanga ashi.

Sorkari tongtipang maparen nung tejangraba melie inyaka ngua sasa bilemer, koba ajanga meta talang nung aliba nüburtem temeden kecha mongui senzüka yuja arur, ta ashi.

Iba amala temeden rongnung lenmang tajung ya

nübur ajak asoshi temeden ka lir. Anungji state sorkar dang nüburtem timtemba reprangteta foothill lenmang ya tongtipangtiba map aka ama inuaktsü ajungshir, ta PPC sangdong ajanga ashi.

Tarutsü asoshi tajungba aginüa nüburtem ajepdang legislator tem kong ali? Sorkar amoa aoba nungi sakang, ta ashi.

NFHRCC ajanga akhangba ama sorkari meinyakra, ajem ajema malitsü. Naga nunger ajunga ajangzüksü asoshi shidak bilemba nübur ajunga dang iba maparen nungittsü ayongzüker, ta PPC ajangasa ashi.

Chief Minister ajanga senden ayonger

Dimapur, Luroi/August 27 (TYO): Nagaland-Assam arütsü ken o asadangsü atema shimteta aliba Assembly's Select Committee indang Convenor aser Chief Minister, Neiphu Rio ajanga Committee pur senden ka September 14, 2021 anepdang 10:00 ako nungi tenzüka Nagaland Legislative Assembly Secretariat, Kohima nung aliba Committee Room nung amentsü, ta metetdaksüogo.

Ano sangdong danga ka nung, Application of the Securitization and Reconstruction of Financial Assets and Enforcement of Security Interest Act, 2002

(SARFAESI Act, 2002) to Nagaland in the context of Article 371-A of the Constitution of India asadangsü asoshi shimteta Select Committee nung mendenpuba aser Chief Minister-i iba Committee indang senden ka September 14, 2021 anepdang 11:30 ako nungi tenzüka Nagaland Legislative Assembly Secretariat, Kohima nung aliba Committee Room nung amentsü, ta metetdaksüogo.

Committee anaprong nung züngsemtem ajak iba senden nung medema arua adentsü mepishia metetdaksür, ta sangdong ajanga ashi.

Rotary International ajanga oxygen concentrator asem tenla agütsü



Dimapur, Luroi/August 27 (TYO): COVID Response Project ka ama Sainte Marie Garros Centenaire (Reunion Island France), Indian Business Club (Paris, France), Rotary Club of Mumbai Ghatkopar (R.I. Dist 3141), Rotary Club of Nagpur South East (R.I. Dist 3030), Indian Chamber of International Business (France) aser Host Club - Rotary Club of Kohima (R.I Dist 3240) ajanga August 26, 2021 nü Chief Minister Office, Kohima nung Department of Health &

Family Welfare, Govt. of Nagaland nem oxygen concentrator set asem tenla agüja liasü.

Iba sentong nung Amardeep S. Bhatia IAS, K.D. Vizo ITS, Manpreet Singh Nagi, Rajan R. Thaokar, Kohima Rotary Club President Rtn. Kezhokhoto Savi, First Lady aser PP Rtn. Neisatuo Mero nungertem dena liasü.

Rotary International indang motto "Service Above Self" ajanga ashiba ama aser taküm omen "Serve to Change Lives" nung ajemdaker Rotary Club

Kohima tir Rtn. Kezhokhoto Savi-i nüburtem dang talisa COVID-19 tashidak agi tesem ajunga sünger aliba mapang nüburtem maneni yaritsü, ta ashi.

Club ajangasa maneni Phek district kübok Community/Primary Health Centres nem oxygen concentrator tera agütsütsü aser ano kar arutsü lir, ta pai ashi.

Ano maneni club ajangasa Kohima jila nung aliba Government High School ka nem vending machine tenlatsü, ta ashi.

Advisor Khehovi-i Union Minister tem ajuru

Dimapur, Luroi/August 27 (TYO): Advisor, Tourism, Art & Culture, Government of Nagaland, H. Khehovi Yephthomi-i August 26 aser 27, 2021 anogotem nung Minister of State for Tourism, Ajay Bhatt aser Union Minister for DoNER, Tourism & Culture, G.Kishan Reddy na ajurua liasü.

Iba mapang Advisor

Yephthomi-i minister ana den Tourism aser Art & Culture dak sendakba maparen balala indang lemsatepa state nung sentong balala inyaksü indang jembia liasü.

Advisor-i onük lemsatepa tem minister ana yagi züngzünga anga lir telangzüba tajung agütsü, ta sangdong ka ajanga ashi.

Chetheba nung SHG indang Friday Bazaar ka tenzüko

Kohima, Luroi/August 27 (TYO): Department of Rural Development- Nagaland State Rural Livelihood Mission (NSRLM), BMMU, Government of Nagaland kübok Self-Help Group (SHG) indang weekly Friday Bazaar ka Phek district kübok Chetheba Town nung August 27, 2021 nü Extra Assistant Commissioner (EAC) Chetheba, Er Omegali ajanga lapoktsüogo.

Iba bazaar lapoktsüdag sentong tatsüka agiba nung jembiba mapang EAC ajanga tetsürtem dang sen aazüksü mapa inyaksü ajungshi aser kibong aser loktiliba nung tetsür temi shilem agitsü indang jembia liasü.

Block Programme Manager (BPM) Senovielhou Koza-i

sentong nung jembiba mapang, NSRLM indang nükjidong tulutibaji farm aser non-farm sector nung makamaiter takum jenjang ajungkettsütsü ya lir, ta ashi.

Kibong shia rongsen jenjang asadanga sülen kija/kibong mesüra telok nem DAY-NRLM ajanga teyari agütsür, ta pai ashi.

Iba sentong nung Chetheba Town indang Head GB, Motahu Rokha-i lokti ayongzüka liasü aser iba sentong nung Area Coordinator, IBCB Vekouto Kezo menden liasü.

Sentong tenzüka Chetheba Town Baptist Church nungi pastor Vesupra Tetseo-i sarasadem aser sentong tembanga CRC Chetheba Town pastor Rudupra Nienu-i sarasadema liasü.

Union minister Teli-i solid waste management project lapoktsü



Dibrugarh, August 27, 2021 (Agencies): Hokolbarnü Union minister of state for petroleum and natural gas Rameswar Teli-i Dibrugarh tezülen Lekai nung solid waste management project ka lapoktsüogo.

"Assam nung mezüngbuba solid waste management project Dibrugarh nung lapokogo. Iba ya Dibrugarh nung atema otsüsütsü anogo ka lir kechiyong küm aika garbage disposal unit tajung maliba ajanga khurettem ajurua

aruogo" ta Teli-i ashi. Dibrugarh deputy commissioner Pallav Gopal Jha-i iba mapatong takok ngua inyakba atema tenüngsang agütsür, ta Union minister Teli-isa shisem.

Assam Urban Infrastructure Investment Program (AUIP) kübok solid waste management project ya ali hectare 28.3 nung Rs 75.03 crore edoka yanglu. Iba plant nung jana nungi mol 100 metric tonnes per day (TPD) yanglutetsü.

Talisa, iba plant nung diesel,

granules aser plastics yanglutsü. Dibrugarh jila kübok municipal ward 22 nung anogoshia jana 80 metric tonnes shi bendener ta asadangteta lir.

Taoba mapang janaji Brahmaputra ayong anasa Maijan ghat nung endoka liasü.

2017 küm state sorkari Dibrugarh nungi kilometer 5 shi pilar aliba Lekai nung iba plant yanglutsü tenzüka liasü. Iba mapa ya Assam Urban Infrastructure Investment Program kübok inyak.

Assam nung maritime institute lapoktsü: Union minister Sonowal

Guwahati, August 27, 2021 (Agencies): Assam chief minister Himanta Biswa Sarma-i mepishiba ama Assam nung maritime institute ka lapoktsü, ta Union minister of ports, shipping and waterways Sarbananda Sonowal-i metetdaksü.

Hokolbarnü 'Waterways as Engine for Growth' atema Stakeholders Conclave nung jembidang Union Cabinet minister-i iba osang metetdaksü.

"Tangaleni osettsüset aser achiajemtsü belenertemi waterways amshitsüla aser Northeast state ajaki pei pei state nung waterways

renloktsü atema mapa inyaktüsü" ta Sonowal-i ashi.

"Northeast-i kidanger linüktem den waterways ajanga sendakteptsü atema Centre-i maneni yaritsü saka iba nungi tajangzüik angutsüba tebilemtsü khuretji Northeast nungertem lir" ta paisa ashi.

Iba sentong nung Assam chief minister Himanta Biswa Sarma, Assam industries, transport minister Chandra Mohan Patowary, water resources minister Pijush Hazarika, Union MoS for MoPSW Shantanu Thakur aser tanga northeast state tem nungi minister aika aden.

"Independence sülen

mapang talangka Northeast nung waterways nung temolung magütsü dang aru saka Prime Minister Narendra Modi lenisüba kübok waterways sector mapa inyaktüsü tenzüikogo" ta Assam chief minister Sarma-ia ashi.

India nung shishilembabaren 95% tashi waterways ajanga inyaker aser iba sector nung lanuputu atema lenmang aika lir, ta paisa ashi.

Chief minister Sarma-isa Cochin Shipyard Limited dang Assam nung ayong anasa alirtem nem medical services tajungba agütsütsü atema river ambulances tajung yanglutsü ayongzüik.

Arunachal nung Siang ayong nung tzü talila ayimer



Pasighat, August 27, 2021 (Agencies): Arunachal Pradesh nung taoba anogo ishika tzünglu kanga aruba ajanga Siang River nung tzü talila ayimer. Siang nung dang masü saka iba ayong nung yimokba Siyom, Simang, Yamne aser Siku ayongtem nunga

'danger level mark' atena ayimer.

Iba ajanga East Siang district administration-i nübortem dang kümdangtsü osang metetdaksüogo.

Maneni, Jarku, 21 Mile Sigar, Old Borguli, New Borguli, Seram aser Namsing

yimtsüngtem nung ayong anasa ali anenzüka aoba osangtem angazüiker.

Arunachal Pradesh water resource department-ia yashi Siang ayong nung tzü 'danger level' atena ayimba osang metetdaksüogo.

NEC Secretary-i Mizoram CM den senden amen

Aizawl, August 27, 2021 (Agencies): Hokolbarnü North Eastern Council (NEC) Secretary K. Moses Chalai-i Mizoram Chief Minister Zoramthanga den senden ka menogo.

Iba senden nung L. Beimopha, Dy. Secretary aser Mehir Dey, Senior PS na aden.

Chalai aser Zoramthanga nati North East aser talisa Mizoram dak sendakba terenlok onüktem lemsatop.

Mizoram-i department balala

kübok NEC ajanga inyakba mapatongtem kanga junga inyaker, ta NEC Secretary-i ashi.

August 13 nü Mizoram CM Zoramthanga-i Tripura aser Assam anasa kilometer 84.50 gari lenmang ka lapokja liasü.

Iba lenmang ya Khedacherra-Damcherra-Zamuang-Kawrthah-Tuilikawn (KDZKT) lir aser January, 2013 nung North Eastern Council (NEC)-i yanglutsü molunga sen lemsükja liasü.

Sep 1 nungi Meghalaya nung tourism tenzüksü

Shillong, August 27, 2021 (Agencies): September 1, 2021 nungi Meghalaya nung Tourism tenzüksü, ta Meghalaya chief minister Conrad Sangma-i metetdaksüogo.

Tanga state tem nungi aruba tourist tem asoshi tourist destinations ajak lapoktsür saka Meghalaya sorkari inyakyim kar latettsüogo, ta

Conrad Sangma-i ashi.

Brihostibarnü Shillong nung cabinet senden amandang iba telemtetba agia liasü.

September 1 nungi vaccine dose anaprong agirtemi Meghalaya semdangtsü melar. Külen, vaccine magirtemi negative RTPCR/TrueNat/CBNAAT report kuli sayutsüla, ta sorkari metetdaksü.

Mizoram nung Rs. 10 crore alang mozü apu



Guwahati, August 27, 2021 (Agencies): Mizoram police-i taküm küm atema ozüing alema shibelenba mozü teimtiba puogo. Hokolbarnü police-i Methamphetamine süngjang lakh 5 tashi apu aser iba atema nisung ana puogo.

Sairang yim anasa police-i Rs. 10 crore alangba mozü ya truck gari ka nung bena lia apu, ta state Inspector General of Police (IGP) John Neihlaia-i ashi.

Truck driver anaji- Mantu Kumar Deb (45) aser Subhas Das (33) na lir aser tenaprong ya Assam kübok Karimganj district nungi lir, ta paisa ashi.

Narcotic Drugs and

Psychotropic Substances Act, 1985 kübok ken o benokogo aser maneni bushisüngdang südar, ta John Neihlaia-i metetdaksü.

Tenati police dang nungi jena aotsü merang saka apu, ta police ketdangtsür kati ashi.

Ano, Brihostibarnü Mizoram kübok Lunglei district nung state excise and narcotic ketdangtsürtemi Rs 24.50 lakh alangba heroin gram 800 tem apu.

"Mualthum North village nung mita aodang heroin apu aser iba dak sendakba nung nisung 4 puogo" ta department sports person Peter Zohmingthanga-i ashi.

Karbi Anglong nung prangpong shibelener 4 apu

Guwahati, August 27, 2021 (Agencies): Assam kübok Karbi Anglong nung nisung pezü ket nung prangpong-injang bena aliba atema puogo.

Osang tejangja ka angazükba sülen Assam police personnel aser Assam Rifles sepaitemi Bokajan police station kübok Gharialdubi tesem mita ao.

Iba mapang .22 rifle ka, 9 mm pistol ka, .22 pistol ana,

Chinese grenade ka, country-made grenade ka aser injang aika angu.

Iba dak sendakba nung apurtemji Raju Ghatowar, Krishna Orang, Lokesh Kangari aser Robert nungter ta jangaogo.

Ajisüaka, par pezü ya telungpur telok kar nung züngsema alir mesüra prangpong shibelener tem'ar ano mejangjatet lir.



TIR YIMYIM YIMOBILEM (EDITORIAL)

DIMAPUR KÜPTOKNÜ LUROI (AUGUST) 28, 2021

Metsüjang mesamadaktsüi alu ayimtsüla

Tanü asüng lanurtem aikati jang aser chi dak alaka tsükbo mangu, kechiyong parnok tain akümba mapang asen lima nung asenok tsüraburtem alu ayimba anen. Asenok chi chiyonger kin ser nung chi ya kong nungi koma züsenteta arur aser akümer aji memetetbaji tebilemstü tulu lir. Iba jagi asenoki chiyongtsü züsentettsüba yabo asenok mapa masü amai, talisa, lanurtemi bilemer. Aji oda, asenok taküm alitsü asoshi chiyongba chiyongtsütem züsentettsü atemabo Assam aser Bihari nung mapa amato bilemer aser asenoki asenok ket nung sen dang lira ojang, kecha shisabolutsü mali ta bilema pei temeten aser akhüm dena yoka sen bushir. Ajisüaka, ashiko sen yangku sünga semer chiyongtsü maka, bener marutet ayaa agi asütsüsa mapang tamajungka ajurutsübajia temenu maka. Item ajakji bilema akok tashi asenok tebok asüngtsü asoshibo tangar dak nendaka melii asena asensasa asen peribo züsentettsüsa senso shia nem khuretsa inyadakttsüsbajia kanga tongtibang kümogo. Iba nükjidong nung tang Horticulture purtemi aluyimtsü asoshi ajungshiba den aluyimertem nem aonsutsü metsüjangtem lema agütsüsbajia aluyimba nung asentenshi tenzüker asütsü. Joko, asenok aika tsük lu masü election lu aser tiyazü lu dang ayimer asünungji, lanurtem taküm raksadakttsüba dang masü saka aluyimba mapatem aser nungjakoja aika amadokogo aser tsük metsü dang masü saka alu nung züsentetba mersü, mapu, züngi, luli aser azüngken tapu balala tsünüa aliba ajak to metsü dena samadakttsüogo. Metsü dena samaba tetezüji aluyimer maliba akümba tamaittsü lir. Asen lima aluyimtsü tesem dang masü tzü mopong tajung, iba jagi kasa somomosa asüyonga asen lima nung adokbasa tajungba aser tayua talangba yutetter. Iba amaji mersüa, mentia aser mapu züngia asen lima nung adokba aser atangbasa tanangba aser tajungba chitetter. Item ajakji samadakttsür tanübo asenok tzümar lu nung aonsutsü aser sünganglijangtem tuluba, talangba aser tekaraba indakttsü asoshi mozü tapu tapu amshia tsünütetba chiyongtsütem alia achir. Asenok ya tangar asoshi tayokdak bazaar tuluka kümogo, anungji oda odabo chiyongtsü alitsüa maka tanü asen temeten ayokba amato asen temang dena tangar dang yoker alar mapa inyakttsü. Tanü asenok loktiliba nung "na kechi inyaker?" ta asüngdang nung melangzütettsüsa nisung aika lir, kechiyong nisung teimbaka kecha meinyaker. Kibong nung nisung kati dang mapa inyaker aser iba jagi parnok kibongji taküm alir, tetezü tanüngba kinungertemjibo kecha mapa meinyaker. Asenok tebilemstüaji aji lir. Joko, asenok alu mapa toktsür talangka asünungji, akhidang tsüraburtemi amshiba mapok tsük, temerem tsük aser temesüng tsük ta asüba tsük metsütema makatsüa akok. Idakji aoksar, asenok tsük metsü bushitepa alu dangi meyiptsüba mapang tongogo. Atangji, akhidang alu mayim toktsüsbajia mapa meinyaknüba agi toktsü masü saka takoksa anguba agi toktsü, kechiyong küm piyong alu ayimba agi kibong aika tebok mesüngtet. Iba jagi aluyimertembo sensaker akümtsü ta bilem. Iba tebilembajia shitak liasü, kechiyong aluyimertem pei alu nungi züsentetba agi pei bok masüng sensaker aküm. Aji oda, ken dena "Temeimtsü aluyimer" ta mejema aten. Sensaker asünungji ajaki nüma repring aser aluyimertemji pei mapa agi pei nümamedangteti kuma adok. Iba ama tia ka nungji shibaibo alu yimnüttsü? Ajisüaka, iba ama putu nungi tanübo aluyimba nunga putu tasen kati ayaokogo. Joko, tanübo zünga-shia metetba purtemi aluyimba putu lir. Aji oda, alu ayimdang teka dena meraksatsüsa semoktsü semer inyakba putu. Atangji, mozü mamshii ayimbajisa tajungba, kechiyong temang asoshia aji tajungba aser jenjanga aji tuluba saka inyakttsü tasak, anungji alima nung alir ajak peritsüsa züsentettsüsbajia makoker. Iba jagi alu nung nisung kanga mebelemi teimba züsentettsü asoshi mozü amshia alu ayimer. Iba denji tanübo mapa teimbaka machine aser gari agi inyakba putu lir, anungji aluyimertem makoksar. Atangji, tamasayongi alu tuluka yima metenzükettsü akok, saka tanü lanurtemi tendanga aser tsük aser aonsutsü metsü danga mesamadakttsüi wazüka ayutsü asoshi aluyimtsü tenzükra, ibaji aluyimba nung asentenshi mera tuluka agir asütsü. Süngwa agidangbo asenok tebok masüngtsü, mesüra sen kija agi taküm melitettsüsa mapanga arutsü, aji meteta asenok ajaki pei yari pei jangraba lu ayimtsü ajungshir.

OLEMSABANG

Aiatai Foot Kill Road

T. Watikaba Jamir, Dimapur.

Alima ajunga nung meimchir nungdakba aikasa lir. Item ajak rongnung lenmang yasa tongtipangtiba. Nagaland nung Rs. 4127 crore indoka gari lenmang yanglutsü asoshi Union Minister for Road Transport, Highway Nitin Gadkari-i online ajanga project 15 inyakttsü atema 5th December 2020 nü long azüngtsüogo. Ano pa-i sa ashiba agi tesüiba küm 6 tsüngda Nagaland nung National Highway renlokakttsü aser tajungba kumdakttsü asoshi project 55 atema Rs. 11,711 crore sanction sütsüba metetdakttsü.

Nagaland nung lenmang yanglutsü asoshi Centre nungi sen crore sa crore yokaka Foot Hill Road asoshibo tenüng mait senzüka doktsüba agi Dimapur Ao Lanur Telongjem (DALT)-i 9th Dec 2020 nü osang kaket nung yamai zülü, "Foot Hill Road meyagluba ajanga timtim ajuruba districttem nungi MLA 48 lir saka kanga dang taoktsükajia tawa Mega Project sangdongba mapang Foot Hill Road medensemba atema MLA 48 rongnungi kati ola madok ta DALT i metetdakttsü". Ibai shidi süra nübener tebu kati pei kibong, pei jala jabaso ayatzüra memetet aser süoshi maki mangsa kima-yimdong nung tangar menüdong kumdakttsüba ama ka kumogo.

Constituency 48 nung aliba nübortemji ajakbo memeteter aser tamaji dangbo masü, tanü alima nung kechisa ataloker ibaji second nung metetadoker, yamaji Government sendong aser telemtetba ajunga yakta dang sangdonger aser idangjisa nüboria meteter, Nagaland asoshi lenmang atema Central Government-i sen-sa-sen yokaka State Government-i Foot Hill Road atemabo züngshia mali, tazungla kumdakttsüogo. Item osang angashia nübortemji pei yimsüsür nung asentsü tenzü. Ano yimsüsürtemia nübör nungnungba ola angashia Chief Minister den ajurua jembitsü lemtet.

23rd Dec.2020 anepdang osang kaket nung Aoer MLA temi Nagaland Chief Minister dang pelar ta front page nung zülü tulu agi zülur angu. Asüji tanepbo ya kechi atema Chief Minister dang pelar-ar repringdangti sür zünga ao nung Chief Minister-i parnok pelatsüsa o tajung aika shia tekaratiba nung iba Foot Hill Road anepalutsütsü nangzük ta zulua angu.

"Tizit nungi khelma tashi yangluba Foot Hill Road ya Nagaland nung gari lenmang rongnung tongtipangtiba lir, taoba mapang ni Chief Minister inyadgang iba gari lenmang yanglutsü tenzü, saka ni MP inyakttsü Delhi-i aoba sülen iba lenmang nung temulung magatsütet, saka dang nungi ni yariteptsü" ta Chief Minister Neiphiu Rio-i Aoer MLA tem dang nangzük. Aoer MLA tem pelabajia ibaji liasü.

Foot Hill Road ya Aoer kija indang lenmang masü, tesüiba mapang lenirtemi nükla aser alizüng tulu yur iba Foot Hill Road ya survey asüba sülen 1974 nungi yanglutsü tenzüka tangibo nübör ajak anisüngzüka senzütettsüba sünung tazü. Nübör nungdak rongnunga nungdaktiba mapa ka tamakok aludakttsüsbajia shir government, shir mapang, shir yimsüsüri pei nübör senzüka doktsü Tepang o-bo tajung saka mapa mali yimsüsürtemi Naga nübör teimbaka küm 47 dak tema ashiokttsüogo. Anungji nübortemji tongtipangsa asen Ao lima kinük ajaklen yimden sapang, Student, Arogo, Watsü telok balala ajak nungi ara atua iba lenmang atema jembitsüla aser osang kaket nung tangsa tang inyakangta akangtsüla.

Foot Hill Road ya kangabo tongtipang ka masü asübo 2019 küm ABAM ajanga State Govt. nem Foot Hill Road yangluba nung amshitsü sen lakh semer trok, Meyi tenemser trok, Noklang ana ser tir ana, ibato magatsüla. Saka onsara tongtipang aser nungdak rongnunga onsara nungdaktiba asüba agi Govt. aser nübör ajak molung ajungmesotsü agatsü.

Naga nübör kanga akia teimba alibalen tongtipang mapa ka küm paikati senzüka doktsüba ya telong nung langka tai alitsü südi. Asen temang tenük telen kar nung komo tamajung kar adokra komo dangji kanga akia tuluba aser tesashiba atahlong ka temang nungsa adoka atar, yamaji asen Aoer tzükong troksanger rongnungi kari memolunger asüü Mesüra Govt. aser yimden nung tongdi nisung nübör asoshi temetsüdakttsü long ama kar ali asüü Mesüra Naga kin rongnungi shir kin-i anema apusorü Mesüra Eastern pur rongnungi kin kari onokpo matentsü ta shia ali asüü Yamaji ka masü asü nungbo, Foot Hill Road ya yakta yongi renemer lila, aser asen Naga nung Assam nung nem dang amaibo mezüngmeshi mesüdakttsüla.

Afghanistan tensa (situation) atema

Talitemjen Imchen

Alima ajonga coronavirus wara tepilemstü nung dang rangloker aruba mapang ka, tanü Afghanistan linük nung tepilemstü tulu adoka lir. Osang palalatem angashiba aser video anguba nungji, par lima ji tetsürentsü ka dang lir. Tanü tensa palaka yashi palaka aser asüng kechi tensa ajurutsü meshitettsüsa tensa. Alima ajongai tsüpoba kaji, channel palala osangji tepang agi dangbo rasaa ashitsü makokba tensa tamajung. Ano ibaji dang masü, channel palala osang dang nungi talila tensaji tamajungba alitsü tsüpoloker. Kechiaser parnoki memelongba videobo alima dang meperokdakttsünü alitsü. Iba ama tensa tamajung ka nung, nisung aika tatem anüko ji ya asütsü asü ta takümtem ji nokdaka alitsü.

Khen ashitsübo, nokonü amertem jibo, shibai tama ngushia kaloktsüdir item ji maongka ta bilema aliba nepotem lir. Aser parnok arangshi (traning) yimyajia yamaji. Saka temeimtsüka anüngnozatem nokonü maben rishikangshibatem ji asen tenük-i video ajanga angur. Anüko shia anüngnozatem rishikangshiba video palala ajanga angudang, asenok tenük nung nüksü makonger.

Tanü Afghanistan nung alirtem, shir telok shidak aser shir telok tai asenoki memetet, saka aseni amangba Tsüngrem-ibo meteta lir. Kodaser alima ajonga asoshi tansütsü agitsüsa Afghanistan nungang adoker, Tsüngrem-i dang metet. Naga nung ajongai kipok nung aser telok palala nung Afghanistan atema sarasadema alitsü. Aser aji Tsüngrem-i angashir alitsü.

Alima dang asü nung, ABAM mesüra NBCC amala telok tentet tuluba agi sarasadem aben nungbo parnok asoshi kanga tajangzük angutsü ama pilemer. Asenoki tsüngtong oa Afghanistan nung alirtem ji meyaritetaka, asenok sarasadem ola youtube ajanga angashidang, Afghanistan lima tasüaküm (survival) tensa nung nokdaka alirtem asoshi anisüngzük tulu asütsü. Alima sobaliba ozüng nung taküm kümzüka alitsüba ji kanga tongtipang. Christian tamanger ka asoshibo tanela kümzüka kodaki aotsüsbajia tongtipangba.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Khristan telok kati Afghan nunger Khristan kibong 3 kumzük



August 27, 2021: Afghanistan nung Taliban teloki yimsüsüba tenzükba sülen Khristan organization ka aser Italy sepaitemi Afghan nunger Khristan kibong asem kumzükogo.

Khristan kibong asem nungji kanga tanur tenet densema lir.

Taoba hopta Fondazione Meet Human teloki Khristan kibong asemji jangjaba sülen Italy sepaitemi parnok ajak kumzükogo.

Kibong asem nungjagi

kibong ka nungibo tebu samar liasü, ta Khristan organization Fondazione Meet Human-i metetdaksü.

Khristan ajak senteper 14 kumzükogo aser kibong asemji Italy kubok Bergamo nung jenoka lidaktsütsü aser Fondazione Meet Human teloki parnok yaritsü.

"Parnok taküm tasen tenzükba mapang nung parnok nungita yaritsü nungdak," ta Khristan organization-i metetdaksü.

Fondazione Meet Human nung Tir, Daniele Nembrini-i, "Khristan kibongtem kumzükba atema onoki Italy nunger aser sepa ketdangsertem dang pelar. Iba maparen takok angutsüsa shilem agir ajak dang pelar," ta metetdaksü.

International Christian Concern (ICC)-i, "Tang Afghanistan nung Khristan kibong aikati linük toktsür jena oner, ajisüaka tia maka item ama kibongtem agizükner linük aika mali, ibayongji Khristanem aika linük nungi jena moutet atsüker," ta metetdaksü.

ICC-isa, "Taliban tangatetbaji- Afghanistan ya Muslim linük ka lir, anungji Muslim nunger masüba nisungtemi Afghanistan toktsür aotsüla mesüra 'second-class' senso agizüktsüla. Islam yimsü toktsür Khristan yimsü agizükertembo Sharia ozüng kubok temerenshi tulu agütsür," ta metetdaksü.

UK nung Arogotemi Kabul nungi aruba refugee tem yarir

August 27, 2021: UK nung Arogotemi Kabul nungi aruba Afghan refugee tem yari tenzükogo, ta Arogo lenirtemi metetdaksü.

Bodhbarnü St Mary the Great Arogo nung lenir aser Chelmsford refugee co-ordinator, Canon Gareth Jones-i, "Arogoi refugee tem yaritsü, ta nangzükba sülen ghonda 24 majungdansa ozü Arogotem nung onoki akokba tashi refugee tem yari tenzükogo," ta metetdaksü.

"Arogotem nung nüburtemi melungsoa tenla agütsür. Onoki nungdak ajak peritsütsü makok saka onoki akokba tashi inyaktsü. Essex aser east London nung aliba partners den senteper onoki akokba tashi tenzüktsü," ta paisa metetdaksü.

Essex Integration ajanga Arogoi Afghan nunger 115 bo agizükogo, iba dak alia Syria nunger kibongtema agizükogo.

"Tang rongdak nungdak atema onoki inyaktsü, kechiyong tarutsü atemabo sorkari dang telemetba agitsü," ta pai ashi.

Tang rongdak nungdakji Arogotem nung refugees agizüka parnok nem senotsü teyari agütsütsü atema lir.

"Onoki ibai meimlai liasü; onok merenemi liasü, anungji nungdak balala peritsütsü atema longjemer inyaktsüla," ta pai ashi.

Mongolbarnü charity telok-Home For Good nung inyaker Dr Krish Kandiah-ia Arogotem dang 'Welcome Churches' nung register süa Afghan nungi aruba refugee ajak agizükang, ta mepishiogo.

Dr Krish-i, "Jangratemtsü kaji- jila aser yimti ajak nung Arogo lir. Arogotem nung timtemer yariner nisung aika lir, aser Arogotemia yaritsü janrar. Anungji Arogotemi Welcome Churches nung register süa training agi tenzüktsüla," ta metetdaksü.

Afghanistan nungi UK-i arur Afghan nunger aika hotel nung anenzüka lir.

Bodhbarnü Foreign Secretary, Dominic Raab-i, British sepaitem tenzükter Afghan nunger aser osangbenertem aika lendong nung aliba nung ajemdaker August 15 nungi tenzükba tang tashi nung parnok 9,000 shi anir aruogo, ta metetdaksü.

Afghan Relocation & Assistance Policy programme (ARAP) kubok Afghanistan nung

UK embassy nung tenzükba arurtem lendong nung lir ta züngshia parnok tama linük nung agizükter.

Iba scheme atema councils aikati inyaker aser refugee tem nem ki sütsütsü aser yaritsü atema sorkaria Pound sen million 5 agütsütsü ta nangzükogo.

Arogotem dak alia charity telok balalai süoshi densema tanga tenla balala bendendar, aser itemji refugees nem agütsütsü.

Afghanistan nungi ajenertem jenokdaksütsü atema UK densema anüolen aliba linüktemi kanga mazüangi meranga inyakdar.

UN refugee agency nung otongdar, Shabia Mantoo-i, "Lendong nung alirtem atema tejenbulu lenmang mali. UNHCR-i Afghanistan den kidanger linüktem dang arrtsü lapoka ayutsü mepishiogo. Arrtsütem lapoka ayutsü nungdak," ta metetdakja liasü.

UN-i ashiba agi, taküm küm kija nunga Afghanistan nung nisung 550,000 dak tema prokshio. Tamalen iba linük nung nisung million 2.9 prokshia liasü. Tang Iran aser Pakistan na kija nungi Afghan nunger refugee million 2 dak tema lir.

India nung nungtugu putir, Benedict süogo

August 27, 2021: India nung kanga nungtugu Khristan putir aser küm 30 tashi 'The Examiner' osangkaket nung yimobilem zülur, Benedict Aguiar August 26 nü süogo; pa arrshi küm 95 liasü.

Taoba mapang Bombay nung tongti putir inyaksang dang nungja tatsüba agi Benny Aguiar, ta aja. Tamalen pa Bandra nung aliba St. Andrew Arogo nung associate pastor inyaka liasü.

Cardinal Valerian Gracias (1900-78)-i 1961 küm pa The Examiner osangkaket nung yimobilem zülur liasü aser pai iba osangkaket nung 1991 küm tashi inyak.

Iba sülen The Examiner nungja melenshia 'The Tablet' ta melen.

1950s nungi 1990s tashi India nung Catholic Khristan

osangkaket nungtugu asem- The Examiner, The Herald aser The New Leader ya hopta shia adokba tongti osangkaketem liasü; aser item rongnung The Examiner sapua azüngertem timba liasü.

Benny-isa Pope John Paul II aser taoba mapang India nung Ato kilonser ana- Indira Gandhi aser Rajiv Gandhi nunger taküm otsü kakettem zülüogo.

Benny-i British Tablet aser American National Catholic Reporter atema-a oacetem zülutsü aser Vatican Council atema-a osang zülüja aruogo.

Pai züluba kaket- "The Making of Mumbai: the Metropolis and its Catholic Past" kanga nungtugu aküm.

1969 nungi 1978 küm tashi pa Indian Catholic Press

Association nung Tir inyaka liasü aser South Asia Catholic Association nunga Tir inyakba den International Union of Catholic Press nung züngsem liasü.

Indian Catholic Press Association nung tang Tir teinyakdak, Ignatius Gonsalves-i, "Pa asüba ya ICPA atema tsürabur ka asüba den kasa. Pai mapang talangka putir mapa den tongteprateper ka ama inyaka aruogo. Pa ya putiotsü meteter ka, kaketzülur ka aser sentong ayonger tajung ka liasü. Pa mapatem ajanga onok maneni ajungshitsü," ta metetdaksü.

"Pa shisa taka liasü aser pa dak sasapela liasü. Pa arrshi tembangnü tashi pa kanga yakyaka liasü," ta Gonsalves-isa metetdaksü.

ANOGO ABEN TSÜNGREM DEN

Temetongshiba agizüktertettetbaji takok sabi

"Shibai temetongshiba meimer pai shisatsü meimer, saka tartsuba semparji tamachi." A. Shin 12:1

Lanuwa mapang yimdak LPS zünga alidang kü tesayur kati mapang shia kü nem tsüangi o agütsüba tanüa bilemteter.

Talisa kü mulungjang nungi kodanga mamatetba o kaji "tamasa nai sen tebushi, saka temetetba shisatsü (Education) bushiang, süra nai idakji rongsen, konang aser tetushi jenti angutsü".

Atangji ibaji kanga dang shitak lir. Tanü tashi liyonga arudang tajangshibatem nungi angateter.

Solomon shisa akasangi shisa tarok jenti agütsüba rongnung "Shibai temetongshiba mesüra tsüangi o meimer, pai shisatsü meimer" ta ashiba yaa ka ta züngshir.

Nisung shibai tangar nungi temetongshiba agizükter pai/lai pei taküm nungi rema maoba senti rongsen bendenba mesüka alitsü, kechiaser temetongshiba agütsür kati kodanga tamajung atema masü saka tagizüksang asoshi ibaji tajangzük aketba aser temoatsü lir.

Tsüngremi kodanga asenok nem tamasa temerenshi magütsür, saka asenok taküm nung tajangzük asoshi temetongshiba agütsür. Pai meima metongshitsüba agizükter ka süa iba lenmang nung teti anitaktetba taküm kaka alitsü ajungshir.

SARASADEM

Kibuba Tsüngrem, Nai metongshitsüba angateta benschir taküm ka ni kumjangma. Amen

LETTER RAIN REVIVAL TELOKI

MANENI SARASADEM TSU AYONGER

Tematiba taküm Tsüngremi kumzükba toktsür aliba amangbapur ajak dangi Kibuba Yisu Khrista temeim salem tulu maneni lemsateper.

Iba lima meimchir takümtem tepseta indoktsü akokba wara tamajung ka arur joko taküm agi kum nabuba asenok kanga dang meinpronga arudagi, taküm aika samatsüogo aser ano aika timtemdagi. Anungji meteta aliba aser memetetaka maneni asenok ajak sarasadem nung kanga dang akangshia yaritepedi ta ayongzükter.

Temeim adianutem, Tsüngrem tenzükertem mesüra alima wadang balala nung alirtem ta kecha tebandang masü saka asenok ajak rongnung külemi tanüla temeshi tashi nung asentenshi tulu ka nungdaka kumogo.

Asenok timba ka Tsüngrem dang nungibo nisung tetsübuba kumogo aser tanüla kumzüktsü dang nungibo alima rongsen taka tait aser jangratem meimer timba kumogo anungji alima terenlok (development) agi mesüzükdaktsür tanela taküm lenmang raksa anenzüka odagi aser aji oda kotak otsü jembitsü taaktsü ka kumadakja molumi lenmang nung nokdaktepogo.

Asenok kidang kibong nungi Yisu Khrista tekümetet taochi mesayutet nung tanü asen Arogo-i anir lokti aser yimten lenir aikati Laishiba O mangatet nung Tsüngrem metsübur aser aji oda sen (money) ji dang ajak nung ajak tashi ta sobaliba tasen ka kumteta odagi. Iba ama mapang ka nung ya Khrista anemer telok ka asenok dangi arunungbo asenok timbai Khrista menangzüktsü aser Arogo ya yakta dang tashi makaba telok ka kumadoktsü anungji arung asenok ajak ken saksalemdi aser asentenshidi.

Kanga nentaka sarasadem tenzüktsü tongtipang onük kar yamai lemsateper:

1. India lima kodang BJP yimsüsübai aru, India lima linük shia nung Khristanem :-

(a) Rishikangshidagi

(b) Tekülem ki raksadagi

(c) Yisu Khrista arogo nung tenzükertem merenshia tepsetdagi.

(d) Asen Naga lima nunga Arogo calendar nung tongtipang anogo aika menentsüogo aser yimten/lokti lenir aikati idakji anidaker. Anungji asen Naga lima yimten nung yimsüsürji BJP kümra, O asen Naga lima ayatai!

Arung adianutem, iba yimsüsüba ya asen lima nung kenyongi malitsü kanga nendaka sarasademtsü tenzükshidi.

2. Tanü wara tamajung nungi kumzükba alitsü maneni sarasademdi.

3. Tsüngkum mongpu melentepba mapang atonger anungji shirang balala nungi kumzükba alitsü sarasademdi.

4. Tsüngrem temeim tulu asoshi maneni Pa tenüng sangdi.

NB .

Iba sarasadem ya 29th August 2021 mapang 6:00 am nungi tenzükba 6:00 pm tsungda nung nai akokba tashi ka sarasademangma.

Rev.Dr.L.Kari Longchar
Rev.C.Teyong Kichu

OLONG PAITEP # 5919


1			2			3		4		
					5					
		6								
							7			
			8							
9										10
				11		12				
13										
14							15			

TIPILEN		LANGTSÜNGLEN	
1. Chiyungtsü oksa	- (5)	1. An tetsü	- (5)
3. Tatalokbatem	- (5)	2. Juzüa senzüba shiruru	- (7)
5. Tama	- (6)	3. Tamendakdak	- (4)
6. Pei meyong aküm	- (3)	4. Tiak-asang	- (6)
7. _ _ _ _ bang	- (4)	7. Tasa	- (7)
8. Kinungpurtem	- (7)	8. Süngjang telung nung aliba	- (6)
9. Nokdak masü	- (4)	10. Ibai masü	- (5)
12. _ _ _ _ la	- (3)	11. Ano mamen	- (4)
13. Ochi masü	- (6)		
14. Yagi Sü ataker	- (5)		
15. Temadok	- (5)		

OLONG PAITEP # 5918 TELANGZÜBA

TIPILEN :		LANGTSÜNGLEN :	
1. Semtu, 3. Lepko, 5. Bilem, 8. Ulu,		1. Sayu, 2. Teb, 4. Kimong, 6. Lungkak,	
10. Tsünpang, 11. Tesangwa,		7. Milak, 9. Zünga, 10. Temopu,	
13. Aoksa, 15. Putir, 16. Yipru.		12. Walu, 14. Ali.	

Noksa nung meputepi aliba 10 bushiang



TANÜBO NAI LANGZÜANG

Q. National Commission for Minorities indang Chairperson küm _____ atema shimer.
 A. 3 Years B. 4 Years C. 5 Years D. 6 Years
 _____ (Taruba adok nung onoki langzüsü)
YASHI ADOK TELANGZÜBA : Endangered

AO OSHI ANGAZÜKDAK:
TANÜ ANGAZÜKTSÜBA OJANG

Ku
 (n) tokolak nung adokba tezüing (hair)
 * Tetsüri ku talang ayur.

Kua
 (n) kü nem agüjang ta meshiba (give me)
 * Asenoki anogo shia chiyongtsü onok nem kua ta sarasademer.

NAI-A YA METETTER MA?

- August 28 nü asor tongtimbang nisung kar:**
- German poet/novelist/dramatist Johann von Goethe (1749)
 - Indian social reformer Narayana Guru (1855)
 - Comic book artist Jack Kirby (1917)
 - New Zealand novelist Janet Frame (1924)
 - Singer/actor David Soul (1943)
 - Actor Luis Guzman (1956)
 - Actor Daniel Stern (1957)
 - Olympic gold medal figure skater Scott Hamilton (1958)
 - Actor Emma Samms (1960)
 - Actor Jennifer Coolidge (1961)
 - Director David Fincher (1962)
 - Singer Shania Twain (1965)
 - Actor Jack Black (1969)
 - Olympic gold medal swimmer Janet Evans (1971)
 - Singer LeAnn Rimes (1982)
 - Singer Florence Welch (1986)
 - Actor Armie Hammer (1986)

SUDOKU # 5960 TELANGZÜBA # 5959

7	1	8			5	3			2	6	1	7	8	5	3	4	9
					6		4		7	9	4	3	1	2	8	6	5
9						1	5		5	3	8	9	6	4	2	1	7
			9	5					1	2	3	5	9	7	6	8	4
			1	4				5	6	8	9	4	2	1	7	5	3
5	6						3		4	7	5	8	3	6	9	2	1
				3	8				9	4	6	2	5	3	1	7	8
					9	6	3		8	1	7	6	4	9	5	3	2
8	3			2					3	5	2	1	7	8	4	9	6

OJANG LUTEP # 5505

ONGAAKM	:	<input type="text"/>						
JNTAGU	:	<input type="text"/>						
IRAAMG	:	<input type="text"/>						
IKAHOS	:	<input type="text"/>						
ARUTTÜS	:	<input type="text"/>						
GBNNOU	:	<input type="text"/>						
BAI	:	<input type="text"/>						
ONMAAGK	:	<input type="text"/>						
JUTMRUASÜ	:	<input type="text"/>						
KKOA	:	<input type="text"/>						

OJANG LUTEP TELANGZÜBA # 5504

TANGAR NUNGI TAJUNG MANGAZÜK PEI SASAA
TAJUNG KECHA SHISATETA MEINYAK

TAN HOPTA ATEMA - KOMA SÜLA ?

Q. Tetsür o tetsür na aser tebur o tebur na apuani kümer aliba kibong arogo nung züngsem kümdaktsü nunga koma süla ?



August 27, 2021 nü New Delhi nung Minister of State for Home Affairs, Ajay Kumar Mishra leniba nung Eminent Freedom Fighters Reconstituted Committee senden amenba noksa nung angur.

Ajaki longjemer kiralongrartem anema nokdaktsüla: India

New Delhi, August 27 (Agencies): Brihostibarnü Afghanistan yimtiba, Kabul nung kiralongrartemi bomb amshia amakba tatalokba aija India-i UN security council dang, iba ama kiralongra tatalokba ajanga, alimai longjemer kiralongra anema nokdaktsüla aser kiralongrar jenokdaktsürtem anema inyaktüsü, ta nenshia metetdaksür, ta ashi.

Brihostibarnü taküm tenla agüja kiralongrar anati Kabul airport nung bomb pokdaktsüba lendong nung Afghan nung 60 aser US sepai 13 poksetogo.

India's permanent

representative to UN aser security council ambassador Tir, TS Tirumurti-i,

"Ni kü o tenzüka kiralongrartemi Kabul amakba tama sashia aitsür. Kiralongrartemi amakba mapang asür kibongtem den onoki mangyim jashi lemsateper," ta metetdaksü.

UNSC nung Ethiopia linük atema jembidang Tirumurti-i, "Kiralongrartemi Kabul amakba ajanga alimai kiralongra anema longjemer raratsü aser kiralongrar jenokdaktsürtem anema inyaktüsü asenok nem nenshia metetdaksür," ta ashi.

US Tir, Joe Biden-ia Kabul

airport kima lendong agütsür kiralongrartemi bushitsü aser tapet temerenshi agütsüsü, ta nangzükogo.

Brihostibarnü White House nung osangbenertem den jembidang Biden-i, "Kiralongrartem aser America yirutsünertem dang onoki tai matoktsü. Onoki nenok bushitsü aser taa agütsüsü. Ni asen nürburtem taginüba ataloktsüsü atema inyaktüsü," ta ashi.

Paisa, Kabul nung Hamid Karzai International Airport amakertemji ISIL-K (The Islamic State of Iraq and the Levant - Khorasan Province) lir, ta metetdaksü.

EC-i vote agütsütsü temsüa alirtem tenüng züluoktsü tuyu

New Delhi, August 27 (Agencies): Sangküm state pongu nung state assembly election agütsü atema maparen tenzüka Election Commission-i state pongu nungji election ketdangsertem dang tang mezüng vote agütsütsüpurtem tenüng züluoktsü aser electoral roll nung maliba tetsürtem tenüng züluoktsü tuyuogo.

EC-i anogo ananü voter awareness & inclusion programme agia liasü, aser iba sentong nung jembidang chief election commissioner, Sushil Chandra-i sangküm election agütsü aliba state tem- Pradesh, Punjab, Uttarakhand, Goa aser Manipur nung chief electoral officers dang election atong matatsüla saka tang nungi tenzüka vote agütsütsü temsüa alirtem, talisa tang mezüng vote

agütsütsüpurtem aser electoral roll nung tenüng malir tetsürtem tenüng züluo tenzükang, ta metetdaksü.

Iba sentong nungsa vote shilem kanga ajema agütsüba tesemtem nung SVEEP campaign agütsü aser awareness agütsütsü atema jemb.

Taruba election nung mezüng vote agütsütsüpurtem ajungshitsü atema EC-i communication initiative mapatong ka tenzükogo, aser iba mapatong kübok EC-i voter shia nem pelaa agizükba temeja shidi agütsütsü.

SVEEP workshop nungsa Election commissioner, Rajiv Kumar-i voters ajak ayimjemsü atema social media aser tanga communications amshitsü metetdaksü.



August 27, 2021 nü New Delhi nung Chief Minister Arvind Kejriwal, Deputy Chief Minister Manish Sisodia aser Bollywood actor Sonu Sood nungeri osangbenertem senden ka nung jembidang tangokba noksa nung angur.

India, Nepal aser Afghan nung 220 Kabul airport nungi meyipa yok

Ambala, Luroi/August 27 (Agencies): Brihostibarnü Kabul airport nungi Indian Air Force (IAF) tayimtsü ka ajanga India-i arutsüpur Afghan Sikh aser Hindu nung 175 den India aser Nepal nung 55 airport nungi meyipa yokba sülen parnok Gurudwara ka nung jenoka lir, ta Hokolbarnü osang ka ajanga metetdaksü.

Anepdang yakta Taliban sepaitem aser US sepaitem na tsüngda mangatettep adokba mapang nung Taliban sepaitemi India-i arutsüpurtemji airport nungi meyipa yok, ta Kabul nung Sikh nungertemi metetdaksü.

Afghan Sikhs aser Hindu nung, India aser Nepal nung 220 ji tang Gurudwara Dashmesh Pita, Karta-E-Parwan nung jenoka lir.

India nung osangbener ka den jembidang Afghan Sikh nung kati, "Anepdang 1:00 ako nungi 1:30 ako tashi airport kima US sepai aser Taliban sepaitem na tsüngda mangatettep adoka liasü, aser injang ola sashia angashi. Taliban sepaitemji airport süngküm kima liasü, aser panoki onok dang, tensa majung anungji nenok meyipa oang ta ashi. Injang khadokbaji lokti pakshidaktsüsü atema khadok asütsüa akok, ajisüaka Afghan Sikhs aser Hindus nung alidak injang mekhahloktsü. Onok dang oang ta ashi, anungji tensa tamajungba akümtsüa akok ta bilema onok Gurudwara Sahib-i meyipa ao. Onok dang masü saka onok den tetsürtem aser tanurtema aika aliba ajanga

onoki airport toktsür aotsü lemtet," ta metetdaksü.

Ano külen Union Ministry of External Affairs otongdar, Arindam Bagchi-i twitter ajanga, "Operation Devi Shakti maneni inyakdar! @IAF_MCC tayimtsü nung India nung 24 aser Nepal nung 11 Kabul nungi Delhi-i arudar," ta metetdaksü.

Hokolbarnü Arindam Bagchi-i, tang Afghanistan nung India nung kwi aliar tejangja meshitetsü, saka yashi Kabul nungi India nung 20 shi anir marutet, ta metetdaksü.

"India-i meyia aruner India nung timbaka anir aruogo, ajisüaka Afghanistan nung ano aika alitsüa akok. Ni kwi aliar tejangja meshitetsü," ta pai metetdaksü.

India nung ano nisung 44,658 dak Covid putet

New Delhi, August 27 (Agencies): India nung ano nisung 44,658 dak coronavirus putet aser iba tashidak agi shiranger 496 süogo; tang tashi nung linük nung nisung 3,26,03,188 dak coronavirus putetogo aser iba tashidak agi shiranger 4,36,861 süogo, ta Hokolbarnü Union Health Ministry-i metetdaksü.

Tang India nung coronavirus agi teshirangdakpur 3,44,899 lir aser ibaji coronavirus caseload nungi shilem 1.06 dang lir.

Tesüiba ghonda 24 tsüngda shiranger 32,988 anepogo. Tang hopta shia coronavirus positive

putetba shilem 2.10 lir aser anogo shia positive putetba shilembo 2.45 kümogo.

Tang tashi nung samples ajak senteper 51.49 tendangogo aser coronavirus vaccine dose crore 61.22 agütsüogo.

Union Health Ministry-i ashiba agi, tang states aser UTs ket nung coronavirus vaccine dose crore 4.05 dak tema lir, ta metetdaksü.

States aser union territories nem tang tashi nung coronavirus vaccine dose crore 58.86 dak tema agütsüogo aser kobi melii dose lakh 17.64 agütsütsü, ta Ministry-isa metetdaksü.



August 27, 2021 nü Cuttack nung aliba SCB Medical College & Hospital nung Odisha Chief Minister, Naveen Patnaik-i coronavirus agi mejungi shirangertem atema ECMO (Extracorporeal Membrane Oxygenation) treatment facility semzüksüba sülen tangokba noksa nung angur.

Taruba hopta Foreign Secy. Harsh Vardhan Shringla-i US semdangtsü

New Delhi, August 27 (Agencies): Taruba hopta Foreign Secretary, Harsh Vardhan Shringla-i US semdangtsü aser United Nations Security Council (UNSC) senden nung adentsü, ta Hokolbarnü Ministry of External Affairs (MEA)-i metetdaksü.

UNSC senden nung adenba dang masü saka foreign secretary-i US Tir, Joe Biden administration den-a senden amentsü.

New Delhi nung

osangbenertem den jembidang Ministry of External Affairs (MEA) otongdar, Arindam Bagchi-i iba osang ya metetdakja liasü.

August ita atema India-i UNSC Tir menden bena lir aser India leniba nung tatembangbuba senden nung Shringla adentsü.

"Foreign secretary-i New York nung maparen ajak tembangba sülen pai Washington DC semdanga linük ana dak sendakba senden nung adentsü," ta Bagchi-isa metetdaksü.



Leamington Spa, England nung industrial premise ka nung mi jangrua aliba nūburtemi repringa aliba noksa nung angur. Iba mi ya adokba sülen temeket nung alirtem ainshitsüsa kumogo, kong chemical dena mi tuluba akumtsü tetsübu nung lir.

Turkey-i Kabul nung Taliban den jembishinü kaogo: Erdogan

Ankara, Luroi/August 27 (Agencies): Turkey-i Kabul nung Taliban den jembishinü mezüngbuba kaongo aser international airport lapokba nung yariteptsü asoshi iba teloki asüngdangba Ankara-i asadangba mapang lir, ta Tir Recep Tayyip Erdogan-i Hokulbarnü ashi.

Turkey leniri ashiba agi, Kabul airport nung Turkey indang embassy khen atema amenoka alidak sensaksem ya aka.

"Onoki Taliban den jembishinü mezüngbuba kaogo, koba ghonda sem ser tesadang agia liasü. Nüngdakra ano maneni iba ama jembishinü akatsü maongka agitsü," ta Erdogan-i osangbener danga shi.

NATO züngsem Turkey ya iba tentet indang mission nung shilem ka ama Afghanistan nung par sepai noklang aika lir aser

tesüiba küm trok tashi airport nung security agüja arur.

Turkey-i Taliban den tesendaktep aliba atema linük nung taitüsüba aliba nung telangzüba agütsüba mapang, kanga kera tensa tamajungba akumba region nung kecha meinyaki malitsü, ta Erdogan-i ashi.

"Jembishinü makai par teimla mesüra aseni imlaba nai memetetsü. Kü tembar, diplomacy ji kechi? Ibai diplomacy ji lir," ta Erdogan-i ashi.

Mapang talangka nungi Turkey-i Kabul nung tongtipang airport ya wazüka yua lapokba nung yariteptsü sentong yanglua aru, saka Bodhbarnü nungi tenzüka Afghanistan nungi par sepaitem anizüker aoba ajanga Ankara-i par nukjidong yutsür amai ajiteter.

Erdogan-i ashiba agi, tangbo Taliban-i airport nung security

ketdang süner aser Ankara nem logistic ketdangsütsü maongka agütsür.

Airport atema telemtetba ka magidang Kabul nung tensa tajungba akumtsüla, kechiaser rasaa ashitsü makokba tia kati aitsü akok, ta Erdogan-i ashi.

"Onoki security agütsütsü, nenoki airport amshiang, ta parnoki ashi. Iba maparen nung yang tashi onoki telemtetba kecha agia mali," ta Erdogan-i ashi.

"Tensa tajungba akumba sülen onoki telemtetba agitsü."

Ita tetenzüklen Taliban-i Afghanistan agiba sülen Ankara-i tang tashinung par sepai 350 aser nisung 1,400 dak tema anizüker ogo.

Taliban-i linük ajunga agia Kabul-i aiba mapang Erdogan-i aija liasü aser akok tashi tekeratiba nung sepai aser nūburtem anizüker aotsü nukjidong lir, ta ashi.

Nigeria telungpuri pua aliba tanurtem chiok

Abuja, Luroi/August 27 (Agencies): Ita asem tejakdang Niger State kübok Islamic seminary ka nung azünger 100 dak tema pua bener aoba nungi anünga alirtem Nigeria telungpuri chiokogo.

Prangbong peria bena aliba telungpur temi May 30 nü Tegina nung aliba seminary ka nung azünger tanur 136 pua bener oa liasü.

Tanur trok parnok kabu nun glia asü aser June ita parnok 15 jena aru, ta iba reju ketdangsürtemi ashi.

"Tanurtem ajak chiokogo. Onoki tang parnoki kidangi yoker," ta iba reju tekolakba, Abubakar Alhassan-i osangbener dang telephone ajanga ashi.

"Ni tangbo parnok kwi chiokar meshitetsü. Onok kidangi aoba sülen parnok züngdangtsüsa akumtsü. Saka kaketshir kata tapur ket nung mali."

Pai kaketshirtem ya kechi yimya nung chiok mesüra parnok alangzüktsü asoshi senotsü agütsü asü masüar ajibo mashi.

Tsürabur Fati Abdullahi-ia par tanur chiokba indang ashi. Abdullahi'er jala arishi küm 18 tain ka aser jabaso arishi küm 15

tain ka dena telungpur temi pua bener oa liasü.

"Parnok kidangi anir arutsürtem den phone ajanga jembia aru. Parnok kidangi shilangba indang repringa aru. Parnok ajurutsü yongyar," ta Abdullahi-i ashi.

Salihu Tanko Islamic school indang director Umar Idris-ia tanurtem chiokba indang ya shiogo.

Northwest aser central Nigeria nung mapa tamajung inyakba telok balalai lendong agütsüba, rakzükraktemba aser nisung telok pua bener aoba tali ataloker. Item telok dang ya parnoki bandits ta ajar. Saka tangbo parnoki kaketshir dak tali tenük yoker aser parnok alangzüktsü rongsen tali meshir.

Item telok yagi taoba küm December ita nungi kaketshir nung kongshiba sülen kaketshir 1,000 shi pua bener ogo. Parnok ya timbaka jembishinüba sülen chiokogo saka ano aika arem nung pua lir.

Tir Muhammadu Buhari-i bandit indang camp tem nung military operation agitsü aser tayimtsü amshia amaktsü totuyuba agütsüogo, saka lendong agütsüba manener.



Kabul airport tezülen kiralongrari lendong agütsüba asoshi temolung raksar, ta taoba US Tir Barack Obama-i ashi. Taliban anema raraba senmang George W Bush dak nungi agizükba sülen Obama-i US sepai meyirijang aika Afghanistan-i yoka liasü. "Asen linük tenzükba mapang takum bendanga agütsüba America nunger kinunger adianutem den külemi mang ayimba dang nungi tamajungtiba kecha mali," ta Obama-i ashi.

Kabul airport nung nisung 85 tepsetba sülen US maneni saksalema lir

Kabul, Luroi/August 27 (Agencies): Kabul airport tezülen Islamic State teloki takum bendanga agütsür bomb pokloktsüba nung US sepai 13 densema nisung 85 takum samaba sülen ano Taliban yimsüsüba nungi jena aotsü merangba Afghan nunger den US sepaitemi Hokulbarnü yaritepba mapang parnok maneni saksalema lir.

Brehostibar nikongdang airport tezülen bomb tesashi ana apokba den injang agi khatapa liasü. Afghan nunger osangbener temi tangokba video nung nisung tasü mang aika airport tatemlen tzi mesüba temeket nung nangtena liasü.

Health ketdangsür ka aser Taliban ketdangsür kati, iba lendong nung Taliban züngsem 28 dena Afghan nunger nisung asür 72 jungogo, ta ashi, saka mapang tatsüka lir Taliban odongtar kati par züngsem kata iba lendong nung masü, ta ashi.

US mitkartemi iba lendong nung par züngsem 13 asü, ta ashi.

Islamic State (ISIS) ya Islamist Taliban aser anüolen linüktem asoshi tsükchir lir, aser parnoki ashiba agi, par telok nungi takum bendanga agütsür bomb pokloktsür kati America nunger mitkar den külemi inuaker aser oshi meyipzüktsür dak tenük yoker bomb ya pokloktsü.

Takum bendanga agütsür bomb pokloktsür yagi bomb anaprong pokdaksü asü kabo yangji parnoki yua aliba pokdaksüar mejangja. Bomb apokba sülen injang khashishiba ya ISIS temi asü mesüra Taliban tanükertemi nūburtem aziüktsü asoshi anünglen injang ya khadokar mejangja lir.

US Central Command nung tekolakba, General Frank McKenzie-i ashiba agi, Islamic State temi ano lendong agütsütsü akok ta repringa atar aser parnoki airport nung tenük yoker rocket mesüra car-bomb pokloktsütsü akok, ta ashir.

"Renema alitsü atema onoki ajak inyaker. Itdangiter osang

kar Taliban den lemsatepogo aser lendong kar parnoki nokdangtet südi ta amanger," ta pai ashi.

Tir Joe Biden-i lemtetba ama US sepaitem ya Afghanistan nungi August 31 tashinung anizüker omatsür ariteper. 2001 küm linük amakba asoshi mang ayangtsü nukjidong ayubabo akhidang atalokogo, ta pai ashir.

Islamic State den sendaktepa aliba ISIS-K amaktsü asoshi Pentagon dang sentong yanglutsü totuyuba agütsüogo, ta Biden-i ashi. Brehostibar nikongdang Kabul airport nung azüdokshiba lendong ya ISIS-K ajanga tenüng agia lir.

"Onoki tatok magütsütsü. Onoki mamadoktsü. Onoki nenok bushitsü aser taa agütsütsü," ta Biden-i White House nungi ashi.

Anüolen linüktemi tayimtsü amshia nūburtem anizüker aoba maparen tatemleni aruba mapang ano lendong talila ataloktsü tesa tali akumer, ta

British Defence Secretary Ben Wallace-i ashi.

"Asenoki Afghanistan yutsür aoba mapang ISIS ama telok kari US mesüra UK ya pari aridok, ta kibur akumtsü merangtsü," ta Wallace-i osangbener dang ashi. Paia ISIS anema mera agitsü nangzüük.

US-i anir 2001 nung amakba ajanga yimsüsüba menden nungi atsüngdokba Taliban, shirnoki mapang ka Osama bin Laden'er al Qaeda telok atsükokdakja liasü, parnoki ano maneni Afghanistan ya kiralongrar jenokdak tesem ka kumdaktsütsü akok, ta anüolen linüktem tetsübu lir. Saka Taliban-i par linük ya kiralongra atema mamshidaktsütsü, ta ashir.

Mezüngbo ISIS-K ya Pakistan den arütsülen tesemtem nung shibanga liasü, saka tangbo linük north tsütsü tesep tanabuba amenoka lir. ISIS-K nungya Pakistan nungi danga kiralongrar teloktem, Uzbek nungi telungpur den Afghan nunger meyokteper lir, ta West Point nung aliba

Combating Terrorism Centre ajanga ashir.

Ano maneni lendong ataloktsü tensa ka nung liaka United States-i maneni nūburtem anizüker aotsü aser tang tashi Afghanistan nung US senso 1,000 shi lir, ta McKenzie-i ashi.

Tayimtsü nung nūburtem anizüker aoba maparen Hokulbarnü tekeraba nung inyaker aser American passport bena alirtem airport telungi aitsü melar, ta airport telung nung aliba Western security ketdangsür kati ashi.

Tesüiba anogo 12 tsüngta anüolen linüktemi nisung 100,000 jungnua anizüker ogo. Saka ita tatami US sepaitemi linük yutsür aoba mapang ano nisung meyirijang aika anüngzüka yutsütsü, ta ashir.

2011 küm helicopter ka khazüka yokba nung US sepai 30 asüba sülenbo Brehostibarnü lendong nung asüba ya America nunger sepai lendong ka nung asüba timtiba alitsü.

GOVERNMENT OF NAGALAND
DIRECTORATE OF SCHOOL EDUCATION
NAGALAND: KOHIMA

NO.ED/SCHO/PMS-3/2019-20

Dated Kohima, the 27th August, 2021

NOTIFICATION ON PRE-MATRIC SCHOLARSHIP

This is to inform that the Ministry has opened the National Scholarship Portal (NSP) on 18th August, 2021 for applying online scholarships for 2021-2022. Students can apply through URL www.scholarships.gov.in or through Mobile App- National Scholarships (NSP) or through the link available in the website of the Ministry i.e. www.minorityaffairs.gov.in. The detailed guidelines and standard operation procedure of the scholarship scheme is available in the Portal.

In view of the above, the following actions have been initiated /decided by the Ministry:

The tentative timeline activities for the year 2021-2022 for fresh and renewal of scholarships in respect of Pre-matric are:-

Sl.No	Activities	Date
1	Submission of Online applications by the students.	18 th August to 15 th November, 2021
2	Last date for first level (Institution) verification	15 th December, 2021
3	Last date for second level (District) verification	31 st December, 2021

- Aadhaar based demographic authentication has been introduced therefore Institution Nodal Officers (INOs) are requested to link their mobile number and Aadhaar number and update their profile in their login.
- The procedure for KYC of new institutions for Institute Nodal Officers (INOs) is provided in the portal under SERVICES SECTION.
- The INOs responsible for the 1st level verification, is required to maintain copies of supporting documents and needs to show the physical record to the DNO/SNO as and when required.
- The Head of the school will certify the list of applications verified by the INO and send it to the DNO for L-2 verification. A copy of the certified list and documents submitted by applicants will be maintained year-wise and retain by the school for at least 5 years.
- The INO should verify on the basis of the documents submitted by the applicants and cross checked with the school record.
- Renewal applicants/students who got scholarship during 2020-2021 shall apply by their existing Application ID.
- Students are advice to keep their account active and as many IFSC code has been changed due to mergers of banks students should update their account before applying.
- Students/Institutions are advised to carefully read the **Guidelines for Registration and SOP** given in the National Scholarship Portal.
- All efforts should be made to adhere to the timelines given on the Portal.

(SHANAVAS C) IAS
Principal Director

Issued by DIPR



OFFICE OF THE
AKHOYA SHISALUYIMER TELONGJEM

TENÜNGSANG AGÜTSÜR

Akhoya shisaluyimer Telongjem ajanga Dr. I.MOAKALA JAMIR (D/o Lt.Imenukshi), Associate Professor Economics Department Zunheboto Government College, lai ICAI UNIVERSITY Nagaland nungi, "Economics and Environmental Consequences of Climate Change on Agricultural Production (Jhum Paddy): A case study on Farmers of Mokokchung District onük nung thesis tabensa züluteta Doctor of Philosophy (Ph.D) jenjang ajangzükta asoshi la nem tenüngsang agütsür.

Ano maneni Dr.THECHANO MERRY (Wb.Lanumeren Lkr kinungtsü Dimapur), laia Nagaland university Lumami Chemistry Department nungi "Synthesis of Natural Products- based Organic Anthracene Scaffolds and some of their Anti-Cancer Activity " Onük nung Doctor of Philosophy (Ph.D) jenjang ajangzükta asoshi la nem maneni tenüngsang agütsür.

Item takok tulu nuguteta yimer ajak nem konang bener arutsüba atema Akhoya shisaluyimer Telongjemi pelaba lemsateper aser kanga nema danga bilemer. Nenoki takok nüngsang bener arutsüba ajanga ano asen shisaluyimer tali ajungmesor, tarutsü anogotem nung nenok shisatsü aser sempet tajung ajanga nübur tenzüksü Tsüngremi takok nung aniangma ta sarasadema moatsür.

Sd/-
Satemmongba
President, AST

Sd/-
Chubakokla Lkr
Gen Sec, AST

Lamhai nung awareness sentong ka ayongzük

Peren, Luroi/August 27, 2021 (TYO): Hokolbarnü (27.08.2021) Peren kübok Lamhai yimsüng nung Covid-19 vaccination dak sendakba nung awareness aser sensitization sentong ka ayonga agia liasü, ta sangdong ajanga metetdaksü.

Iba sentong nung Dr. Rukuto, MO I/c Dungki PHC shisalen sayur liasü aser pai telok dang atsüayonga melii iba Covid-19 vaccine maongka agitsü mepishiogo.

Nüburtem aoksadaktsütsü aser mashileni anitsüsa social media sabang balala nung olulu/ tiyazü osangtem prokba nung mamangtsü aser mapang shitak nung vaccine agiadoktsü asoshi pai sentong nung adenertem ajungshia liasü.

Dr. Rukuto-i, Covishield vaccine indang rasa ashiba den külemi iba dose agütsüba yimyatem telok dang metetdaksü.

Pei sasa kümzüka aliba den, iba tesashi wara nungi kidang/ kibong nung adianutem aser lokti/telok kümzüka yutsütsü asoshi vaccine agitsü nüngdaker, ta pai telok ayongzük.

Iba wara osang angashia aoksa mesüra tsüba malitsüla, saka tekümdangtsü meratem nung asenoki teti anidaktsüla, ajiasünungang asenoki iba wara nungi jenbua litetsü, ta pai telok dang metetdaksü.

Iba awareness aser sensitisation sentong nung NHP Chairman, Iperai menden liasü aser sentong tenzüka Deacon Haikomy-i sarasadem. Ilamgong, Village Secretary-i tepela anküp o jemi aser iba sentong tembanga Deacon Pausuidi-i tatem sarasadema liasü.

Maneni, iba workshop sülen, shisalen sayur aser sentong nung adenertem sensaksem aka, ta kasa sangdong nung shia lir.

Yami Gautam-i 'Lost' film tangokzükogo

Mumbai, Luroi/August 27, 2021 (Agencies): Actress Yami Gautam-i la indang taruba film - 'Lost' tangokba maparen tembangba osang lemsatepogo. Taoba ita, Aniruddha Roy Chowdhury indang investigative drama - Lost tangok tenzüker aser iba film nung Yami-i crime reporter ama shilem agiogo.

Taküm küm tetenzüklen, actress Yami-i film yanglur Aditya Dhar den kibong akümba sülen, film maparen tsütsü la kanga mazüngi inyaka liasü.

Iba film takok ngua tangokba atema, Yami-i Instagram sabang ajanga film indang team dang pelaba lemsatep.

"Tanü 'Lost' tangokzükba mapang, iba project tenzüker nungi tatem tashi ajangshia arubatem menungra bilemteter. 'Lost' indang cast aser crew ajanga dang pelar. Iba maparen tenzüker külen nungi tatem tashi nenoki kanga nungita aruogo. Tony danga pelaba shisemer, shiba industry nung ni sapuba director tajung rongnung pa ka

asütsü. 'Lost' atema pa director tetemjen ka liasü. Tang ama Covid-19 tensa tamajungdang, onoki tayongzükba jenti ajangshiaka, team ka ama tatem tashi amalitepa inyakogo," ta noksa ka den külemi Yami-i iba olen lemsatep.

"'Lost' ama taoba project nung iba amala maparen (acting) inyakdanga mali aser iba tajangshiba kodanga mamatetsü. Kwinakati lenmang balala ajanga nungita yariogo nenok kija shia dang pelaba metetdaksü. Team nung Manisha, Vidhi, Humera, Sanya, Shivraj aser Ram nung danga alakteta pelaba shisemer. Nenok maparen nung ni tamang akar. #TeamLost," ta lai shisem.

Yami dak alaka, iba film nung Pankaj Kapur, Rahul Khanna, Neil Bhoopalam, Pia Bajpiee, aser Tushar Pandey nung danga shilem agiogo. Lost film ya Kolkata kübok tesem balala nung tangoka liasü.

The Jacksons-i 'Happy Days Festival' nung shilem agitsü

Luroi/August 27, 2021 (Agencies): Asür. Michael Jackson, pa asoba anogo (29.08.2021) matongdang, pa nem akhüm tetushi agütsütsü asoshi kentener telok aser Michael'er adianu - The Jacksons-i Honibarnü (28.08.21) Happy Days Festival nung shilem agitsü terenemba lir.

Michael asoba anogo bilemteta aser pa nem akhüm agütsütsü nükjidong nung, 'I Want You Back' kentener teloki iba festival nung shilem agitsü; aser parnok rongnung Tito Jackson-i ashiba agi, iba sentong nung onoki 'King of Pop' (Michael Jackson) indang nungtugu ken kar atentsü.

Jackson 5 nung Michael-i kentener tongti ka ama shilem agia liasü.

Tito-i, "Iba sentong nung

shilem agitsü yongyar. Onoki Michael indang kensep nungi ken talisa 'Rock With You' aser 'Can't Let You Get Away' atentsü renemdar.

"Michael nem akhüm tetushi agütsütsü asoshi, onoki sentong balala achaayanga arudar aser iba festival nung pa bilemteta shilem agitsü aliba ya ajak dang tajungtiba asütsü. Onoki pa kanga menungrar aser pa den külemi ken yangluba bilemtetdang onoki pa menungra aiter," ta Tito-i ashi.

2020 küm alima ajunga asungba coronavirus wara ajanga sentong tem thitema arur sülen, Happy Days Festival nung The Jacksons puri mezüng shilem agir asütsü.

Covid-19 lockdown mapang, Tito-i kensep tasen ka yanglu aser iba festival mapang, pai

'Love One Another' ken atentsü.

Iba ken - 'Love One Another' ajanga alima nung temeim proktsü asoshi nübur molung nung jembitsü imlar, ta pai lemsatep.

'Happy Days Festival' (www.hdfestival.co.uk) sentong ya Honibar aser Deobar anogo Esher, Surrey kübok Imber Court nung ayongzüktsü.

Honibarnü, iba sentong nung, The Jacksons den Martha Reeves and The Vandellas, R&B telok Shalamar aser Harold Melvin indang Bluenotes temi shilem agitsü.

Deobarnü, House Gospel Choir, Soul Ii Soul, Stereo MC's, Alison Limerick aser Sonique nung shilem agitsü terenemba lir.

BTS-i 'Butter' indang remix version ka saya

New Delhi, Luroi/August 27, 2021 (Agencies): Nungtugu K-pop telok BTS-i America tsür rapper Megan Thee Stallion den longjemer atenba ken - "Butter" indang remix version ka sayaogo. Iba ken, koba 'rap verse' talila inoka tenogo, tan hopta tetenzüklen iba version dak sendakba nung mangatetep adoka liasü. Iba mapang, Stallion indang label - 1501 Certified Entertainment ajanga iba ken sayatsü nokdang.

Megan-i iba tenokdangba agentsü asoshi la label anema

tebilemba kar benok aser ibaji ajanga Hokolbarnü iba ken sayatsü asoshi lenmang lapok.

Alima ajunga nung ken sapurtemi "Butter" track ya "song of summer" ta züratema agizükba asadanteta aser iba tepela nung BTS-i iba ken indang remix version yanglutsü lemtet.

BTS nung RM, V, Jin, Suga, J-Hope, Jimin, aser Jungkook nung dena lir aser taoba mapang parnoki "Sweeter" aser "Cooler" indang version densema 'Butter' indang remix

ken sayaogo.

"Ni BTS sapur, ajiasünung 'Butter' remix nung kü ken shilem ka inoktsü asoshi pelar. Fans dang iba ken angadaktsütsü asoshi yongyaseter," ta Stallion-i ashi.

Tawa "Butter" ken ajanga Billboard nung otsü tasen yangluogo. Butter' track ya hopta tuku tashi 'No.1 Billboard Hot 100 song of 2021' nungi atsüngzüka melui aruogo.

Iba dak alia, iba ken - Butter sayar sülen ghonda 24 tsüngda YouTube nung 108.2 million views akümba aser Spotify putiotsü nung '20.9 million unfiltered global streams' densema record balala yangluogo.

BTS telok nüngja Bangtan Sonyeondan (Bulletproof Boy Scouts) mesüra Beyond The Scene lir. Linük balala nung K-pop band rongnung BTS ya nüngtugu telok ka asütsü.

Tokyo Paralympics: Bhavina Patel semifinal-i iogo



Tokyo, Luroi/August 27, 2021 (Agencies): Hokolbarnü, Tokyo Paralympics - tetsür kija table tennis quarter final asaya nung, India tsür Bhavina Hasmukhbhai Patel-i world no. 2 Serbia tsür Borislava Rankovic madak takok ngur semi-final-i iogo.

Iba asaya nung, Bhavina Patel-i 11-5, 11-6, 11-7 agi Rio Olympic nung Gold medal takok angula Borislava Rankovic tsükdaksü. Iba asaya minute 18 nung tembang.

Patel-i takok ngua semi-final tongtetba ajanga, iba Paralympics Games nung India contingent-i mezüing medal angutsü asoshi teimla agütsüiogo.

Honibarnü, Bhavina-i China tsür Miao Zhang den semifinal asayatsü. Tetsür kija quarter final asaya tanga ka nung, Zhang-i Germany tsür Sandra Mikolaschek madak 11-2, 11-8, 5-11, 11-9 agi takok nguogo.

Group A nung asaya tetenzüklen, Bhavina-i 3-1 Great Britain tsür Megan Shackleton tsükdaksü. Bhavina aser Megan na asayaba mapang, Bhavina-i game/set tasembuba 17-15 agi takok angutsü asoshi lai game point ka angu. Minute 41 nung Bhavina-i Megan madak 11-7, 9-11, 17-15, 13-11 agi takok angu.

Bhavina Patel-i mezüing set nung junga asaya tenzük, saka set tanabuba nung point ishikati la tsükadok. Tatembangbuba set nung lai Megan makokdang, set tasembuba nung lai tali temolung agütsür asaya.

Group A nungi Bhavinaben aser China tsür Zhou Ying naprongla taruba round nung asayatsü temsüa kumogo. Bodhbarnü, Paralympics - table tennis mezüing asaya nung Zhou-i Bhavina madak takok angu. Iba asaya nung Bhavina 3-11, 9-11, 2-11 agi Zhou makok.

Tang asaya aliba

Paralympics nung, table tennis tsütsü 'class 4 competitor' tem shilem agidar.

** Powerlifting - Sakina Khatun jenjang pungobuba nung tembang

Hokolbarnü, kasa asayamung 'women's 50kg category' powerlifting tetoktepba nung, India tsür powerlifter Sakina Khatun jenjang pungobuba nung tembanga liasü.

2014 Commonwealth Games nung bronze medal angula, Sakina-i touzük seret 93 shi ajungkettet.

Tetsür powerlifting final tetoktepba nung, China tsür Dandan Hu-i 120kg ajungkettetba yong, lai gold medal angu. Kasa asaya nung, Egypt tsür Rehab Ahmed, shibai 120kg ajungkettet, la den Great Britain tsür Olivia Broome (107kg) nati silver aser bronze medal angu.

Arishi kum 32 tain Sakina-i mezüing seret 90 shi ajungket. Tanabuba round nung lai seret 93 ajungkettüsü merandang, saka makok. Tasembuba nung lai kasa touzük (93kg) ajungkettet.

Commonwealth Games asayamung nung medal angur India tsür Paralympian rongnung Sakina Khatun asütsü. 2014 kum Glasgow Games nung lai bronze medal angu. Iba dak alia, 2018 Para Asian Games nunga lai silver medal nguogo.

GM Sethuraman-i Barcelona Open kokogo



Barcelona, Luroi/August 27, 2021 (Agencies): India nung Grandmaster S P Sethuraman-i Barcelona Open chess asayamung tite kokogo. Kasa asayamung nung külem India nung, Karthikeyan Murali tasembuba jenjang nung tembang.

Iba chess asayamung final nung Sethuraman aser Russia nung Daniil Yuffa na point kasa nung tembangba sülen, tie-break score ajanga Sethuraman-i iba asaya koktettsü atema, round tuku tashi toktepba mapang, pai round ka nung danga tamakok mangu, kong match trok shi takok anguba den match 3 shi asayar ana tsüingda draw süa liasü.

Tatembangbuba round asem nung pai point timba anguba densema, külem India nung N R Visakh aser Armenia nung Aram Hakobyan madak takok angu. "Barcelona Open 2021 takok anguba asoshi pelar," ta asaya temer sülen Twitter ajanga Sethuraman-i lemsatop.

Sethuraman-i takok anguba yong pai Elo point 8.5 shi angu. Kasa mapang, Murali (Elo 2606)-i point 6.4 shi angu.

Round pungobuba nung, Sethuraman aser Murali naprongla draw nung tembang.

Murali-i game trok takok anguba den, game ana draw nung tembang aser round trokbuba nung pai Hakobyan makok. Murali-i külem India nung Aravindh Chithambaram densema tanga asayar pezü den point' tenetnet nung tembang, saka tie-break score tajungba anguba yong pai tasembuba jenjang ngutet.

Final round nung, Murali-i ayong ayonga dang WGM R Vaishali tsükdaksü.

Barcelona Open 2021 nung, India nung Chithambaram-i jenjang pungobuba ajanzüktet. Kasa tetoktepba nung, asayar ishika point 6.5 nung tembangba sülen, Arjun Kalyan (6.5 points) jenjang tukububa aser Visakh jenjang 10buba nung tembang.

India nung International Master N R Vignesh aser Vaishali nati point trokrok ngua tena jenjang 15buba aser 16buba nung tembang.

Chris Cairns tetsüing marakzüteti kumogo

Melbourne, Luroi/August 27, 2021 (Agencies): Taoba mapang, New Zealand cricket team nung all-rounder Chris Cairns Australia nung temolungjang surgery agiba mapang pa tongtoret nung azü junga mejajai akumba sülen, pa tetsüing marakzüteti (paralysed) kumogo, ta sangdong ajanga metetdaksü.

Tang, arishi kum 51 tain Chris pa talidak Canberra (Australia)-i meyipa aruogo, saka Sydney nung pa temolungjang surgery agidang temang shilem nung timtem balala adokba sülen, pa temang kanga mejungi lir.

"Pa (Chris) takum kumzüksü asoshi Sydney nung ajungbena temolungjang surgery agiba mapang, Chris indang tongtoret nung azü junga mejajai akum (tongtoret mapa meinyaki akum). Iba timtem ajanga pa tetsüing marakzüteti kumadok," ta Hokolbarnü Chris Cairns indang lawyer Aaron Lloyd-i ashi.

"Iba timtem tendangtsü atema Australia kübok tongtoret reprangba mozüki tajung (specialist spinal hospital) ka nung pa anepalutsü," ta Aaron-i

ashi. Aortic dissection (Temolungjang nungi aoba tezü, kong azü jajar iba tezü telung shisaba/shimaba) agi Chris kangshiba sülen, iba timtem nungi mapang talangka pa taneptsü menguteti arudar. Iba timtem anepalutsü atema, tan ita tetenzüklen Chris ya 'life support' agüja Sydney indang St Vincent's Hospital-i anir ao.

Tang ama timtem aser shisabulu tensa mapang ka nung, nüburtemi shisatsü aser lenmang balala ajanga yariba asoshi Chris aser par kibongi pelaba lemsatopogo.

All-rounder tajung ka ama, 1989 aser 2006 kum tsüingda Chris-i New Zealand atema Test 62, ODIs 215 aser T20Is 2 asayaogo.

Cricket wadang tsütsü Chris wangshiba mapang, 2000 kum pa tenüing Wisden Almanack indang cricket asayar rongnung züngok. Chris tebu Lance Cairns-ia New Zealand atema Test cricket asayaogo.

Cairns aser pa kinungtsü Melanie na Canberra nung alir aser tena nem tanur ana moaja lir.

Watsü Mungdang 22.. (Tapak 1 nungi...)

Mokokchung D.C Limawabang Jamiri tepela o tatsüka jembidang, yakum Covid-19 wara ajanga alima ajak timtemba mapang Watsü Mungdang District Task Force den yaritepa mapa tajung aika inyakba asoshi pelaba metetdaksüba den ano Covid-19 tongpang metembangli lir, anungji, iba nungjia maneni shilem agütsü asoshi khuret kar lemsatop.

Aotsür dak sempet alakteta moatsüba kaji ketdangsuba ya lir, kecdangsur tajung alidakji kechaia anungakong masür, ta ashi. Aotsür maitsü (identity)

koba tetsür temeten aser oshiohen lir ibaji wazüka ayuba den Aotsür rongsenkettsüing ajungkettsüba kanga tongtibang, ta paisa teinyaktsü kar shisem. Sentong nung Mokokchung DC-isa Watsü Mungdang adokba "Lenpir" kaket ka sayatsü.

23 buba Watsü Mungdang item mendenpur lenisüba nung anir aotsü; tir - Wt. S. Arenla Lkr (Changtongya), Tatong tir - Wt. Odisola (Mongsenyimti), tongti zülur - Wt. Süngtireben (Mopungchuket) aser tatong zülur - Moatola (Khar) parnokji shimogo.

Power department ya... (Tapak 1 nungi...)

Ajisüaka, Dimapur nung power shut down alir aser iba ya nisungtemi power auyaa atsükba ajanga lir. Nagaland kübok Dimapur district nung power 50% tema atsüker aser power auyaa atsükba anendaktsütsü atema special committee ka tentetogo, ta K.D. Vizol-i metetdaksü.

"Power department staff aser talisa meter reader tem office-i shitak aotsüla aser mapai junga marurtem ozüing tapet agi merenshitsü. Electric bill shitak angutsü atema civil society temi yaritepdaktsünür" ta paisa ashi.

Sentong nung Dimapur Deputy Commissioner, Rajesh Soundararajan IAS-i o jembidang electric bill magütsüba inyakyim ya magienra tensa tamajung nungi tamajungtiba ajurutsü.

Dimapur nung commercial

maparen teimba inyaker anungji power supply shitak melira takoksa angutsü, ta paisa ashi.

"Dimapur district administration-i akokba tashi power sector tashi itdaktsütsü atema team leader aser department den yariteptsü" ta Rajesh Soundararajan-isa metetdaksü.

Iba senden nung DUCCF, DNSU, DMC, Naga Council Dimapur, Chumukedima town Council nungi teshimtet nübotem aden aser parnokki pre-paid metering system dena tanga tebilemstütem lemsatopa liasü.

Senden nung mendenji CE, Distribution and Revenue, Engineer Moa Aier liasü aser power department, Chumukedima Electrical Division o Police department nungi ketdangsurtem aden.

BILEMDANGANG

"Shisa akaribo lipoklisang meteta akümüli wadang jajar."